

醫

說



YZLI0890169005

醫說卷第三

神方

夢獲神方

虞雍公并甫紹興二十八年自渠州守召至行
在憇北郭外接待院因道中冒暑得泄痢疾連
月重九日夢至一處類神僊居一人被服如僊
官延之坐視壁間有韻語藥方一紙讀之數遍
其詞曰暑毒在脾濕氣連脚不瀉則痢不痢則
瘧獨煉雄黃蒸餅和藥甘草作湯服之安樂別

作治療醫家大錯夢回尚能記卽錄之益治暑

泄方也如方服遂愈

夷堅志

夢藥愈眼疾

饒州民郭端友精意事佛紹興乙亥之冬募衆
紙筆緣自出力以清旦靜念書華嚴經期滿六
部乃止癸未之夏五部將終忽兩目失光翳膜
障蔽巫醫鍼刮皆無功自念唯佛力可救次年
四月晦誓心一日三時禮佛觀音願於夢中賜
藥或方書至五月六日夢皂衣人告曰汝要眼

明用獺掌散熊膽丸則可明日遣詣市藥但得
獺掌散點之不效後於道藏獲觀音治眼熊膽
丸方舉室驚喜卽依方市藥旬日乃成服之二
十餘日藥盡眼明至是年十月平復如初卽日
接書前帙感靈應特異增爲十部乃止今眸子
瞭然外人病目疾者服其藥多愈藥用十七品
南熊膽一分爲主黃連蜜蒙花羌活各一兩半
防己二兩半草龍膽蛇蛻地骨皮大木賊仙靈
脾皆一兩瞿麥旋復花甘菊花皆半兩麤仁二

錢半麒麟竭一錢蔓菁子一合同爲細末以羯羊肝一具煮其半焙乾雜於藥中取其半生者去膜爛研入上件藥杵而丸之桐子大飯後米飲下三十丸諸藥修治無別法唯木賊去節麩仁用肉蔓菁水淘蛇蛻炙云

夷堅志

觀音治痢

李景純傳有一婦人久患痢將死夢中觀音菩薩授此方服之遂愈用木香一味細末米飲調

服
本草

人參胡桃湯

洪輯居溧陽縣西寺事觀音甚敬幼子佛護病
痰喘醫不能治凡五晝夜不乳食證危甚又呼
醫杜生診視之曰三歲兒抱病如此雖扁鵲復
生無如之何爾輯但憂泣辦凶具而其母以嘗
失孫愁悴尤切輯益窘懼投哀請禱于觀音至
中夜妻夢一婦人自後門入告曰何不服人參
胡桃湯覺而語輯輯灑然悟曰是兒必活此蓋
大士垂教爾急取新羅人參寸許胡桃肉一枚

不暇剥治煎爲湯灌兒一蜺殼許喘卽定再進
遂得睡明日以湯剥去胡桃皮取淨肉入藥與
服喘復作乃只如昨夕法治之信宿有瘳此藥
不載於方書蓋人參定喘而帶皮胡桃則斂肺
也予以淳熙丁未四月有痰疾之撓因晚對上
宣諭使以胡桃肉三顆生薑三片臨卧時服之
畢卽飲湯三兩呷又再嚼桃薑如前數且飲湯
勿行動卽就枕旣還玉堂如恩指敬服旦而嗽
止痰不復作輯之事亦類此云

已志

一白愈志 懸癰

穀道外腎之間所生癰毒名爲懸癰醫書所不載世亦罕有知者初發唯覺甚癢狀如松子大漸如蓮實四十餘日後始赤腫如胡桃遂破若破則大小便皆自此去不可治矣其藥用橫紋大甘草一兩截長三寸許取山澗東流水一大盆井水河水不可用以甘草蘸水文武火慢煮不可性急須用三時久水盡爲度擘視草中潤然後爲透却以無灰酒兩椀煮俟至一半作一

服溫服之初未便效驗二十日始消未破者不
破可保安平雖再進無害與化守姚康朝正苦
此癰衆醫拱手兩服而愈

神授乳香飲

吳大昔以泥補葺善神後因結屋墜梯折傷腰
勢殊亟夢神來云汝昔嘗救我我不敢忘授以
乳香飲其方用酒浸虎骨敗龜黃耆牛膝草薺
續斷乳香七品覺而能記卽喚子買藥敬服之

一旬愈

已志

夢張王藥愈癰

時康祖爲廣德宰事張王甚敬舉家不食猪後授溫倅下體抱疾小愈左乳復生癰繼又胃臆間結核其大如拳堅如石荏苒半歲百藥皆不能施已而牽掣臂腋徹于肩痛楚特甚亟禱王祠下夢間語曰若要安但用薑自然汁製香附服之可也夢覺呼其子檢本草視之二物治證相符訪醫者張棣亦云有理遂用香附去毛薑汁浸一宿爲末二錢米飲調才數服瘡膿流出

腫硬漸消自是獲愈

庚志

救疫神方

靖康二年春京師疫氣大作有異人書一方於齋舍凡因疫發腫者服之無不效其方黑豆二合炒令香熟甘草二寸炙黃以水二盞煎其半時時呷之

同上

治吐血

秀州進士陸迎忽得疾吐血不止氣蹙驚顫狂躁跳躍雙目直視至深夜欲拔戶而出如是兩

夕諸醫通用古方及草澤單方拯療不瘳舉家
哀訴所事觀音夢授一方但服一料當永除根
本用益智一兩生珠二錢青皮半兩麝一錢碾
細末燈心湯調陸覺取筆記之明日治藥病隨
手而愈

同上

呂真人治目疾

江陵傅氏家貧鬻紙爲業性喜雲水見必邀迎
小閣塑呂僊翁像朝暮焚香敬事甚謹雖妻子
不許輒至一日有客方巾布袍入共語曰適有

百金邀傳飲傳目昏多淚客教用生熟地黃切
焙椒去目及閉口者微炒三物等爲末蜜丸桐
子大五十九鹽米飲空心下傳如方治藥不一
月目明夜能視物享年八九十耳目聰明精力
如少年

年志

驚風妙藥

趙周氏之子三歲忽驚風掣瘈體如反張弓不
納乳食四肢晝冷衆醫莫能措手族弟善信來
云邑主簿李賡藏一方療此證如神急求併力

治藥才合就便以擦兒齒少頃作噦咳聲手梢
轉動自夜至旦灌兩餅從此平復趙焚香設誓
將終其身以施人名蝎稍餅子用赤足全蜈蚣
一條蝎梢乳香白花蛇肉朱砂天南星白殭蠶
各半兩麝香三錢凡八味砂乳麝別研蛇酒浸
去皮骨取淨南星煨熟蠶生用與蜈蚣五者爲
末別研三者和均酒糊丸捏作餅徑四分煎人
參或薄荷或金銀花湯磨化一粒周歲以下者
半之全活小兒不可計

庚志

治內障羊肝丸

治目方用黃連者多矣而羊肝丸尤奇特異用黃連末一兩白羊子肝一具去膜同於砂盆內研令極細衆手爲丸梧桐子大每服以溫水下三十丸連作五劑但是諸目疾及翳障青盲皆治忌猪肉冷水唐崔承元者因官治一死囚出活之囚後數年以病目致死一旦崔爲內障所苦喪明逾年後半夜嘆息獨坐忽聞堦除悉窣之聲崔問爲誰徐曰是昔蒙活囚今故報恩至

此遂以此方告言訖而沒崔依此合服不數月

眼復明

本事方

神精丹

許叔微家一婦人夢二蒼頭一在前一在後手中持一物前者云到也未後者應云到也擊一下爆然有聲遂魘覺後心一點痛不可忍昏悶移時叔微所合神精丹有此證即取三粒令餌之過數刻痛止神醒其方出千金中殆晉景公夢二豎之比也

同上

寒嗽

晉之姪事觀音甚謹適苦嗽踰月夜夢老僧呼
謂之曰汝嗽只是感寒吾有方授汝但用生薑
一物切作薄片焙乾爲末糯米糊丸芥子大空
心米飲下三十丸覺如其言數服而愈

癸志

丁公藤愈風

南史解叔謙鴈門人母有疾夜於庭中稽顙祈
告聞空中云得丁公藤治卽差訪醫及本草皆
無至宜都山中見一翁伐木云是丁公藤療風